

## COMMENTARI

# L'istorgia sur da Quadroni che quadra uschè bain

DAVID TRUTTMANN/FMR

L'istorgia è raquintada. Ella è perfin betunada. Ed i manca mo anc ina firma da producciun da Hollywood che la pudess ficziunalisar e perfin dramatisar anc pli fitg, sco sch'ella na fiss betg schon drammatica e trista avunda: l'istorgia dal cartel en la branscha da construcziun grischuna e da l'enconuscent whistleblower *Adam Quadroni*. L'istorgia è vegnida raquintada en emprima fila dal magazin online «Republik». E l'istorgia è sa fitgada fermamain en la schientscha da l'entira Svizra. Tut cler, damai? – Na, l'istorgia va zop en in punct neuralgic.

Il chantun Grischun ha ussa bain examinà l'entir scandal uschè minuzius sco anc mai en s'istorgia da passa 200 onns. Però diversas dumondas e plants ston anc vegnir tractads en tribunals. Il scandal n'è damai anc ditg betg scuà davent.

En l'artitgel il pli actual, suentar il segund rapport da la PUK avant in mais, resumescha la gasetta online «Republik» tut la polenta suandantamain: «Und alle haben fettige Finger.» – Quai è in bel maletg che tutga bain la nota. Il grass è vi da la detta da divers protagonistis: uffizians, impressaris, politica etc. Mo ch'ìls auturs e las auturas han emblidà in protagonist ch'ha era ina tolca da grass vi da la detta, numnadamain els sez, ils auturs dal magazin «Republik» sco era bleras autras medias ch'èn suandadas al narrativ dal magazin.

Pertge? Per responder èsi da prender bravamain schlantsch.

L'istorgia raquintada ed implantada en las testas svizas enconuschan tuttas e tuts, e perquai saja ella resumada qua en ina frasa: Adam Quadroni denunzia las praticas cartellisticas en la branscha da construcziun en Engiadina e vegn perquai schicanà massivamain da las autoritads publicas e da ses ex-collegas impressaris. Quai è il narrativ ch'è entant derasà ed impregnà en l'entira Svizra. Sch'ìns dumonda insatgi giu la Bassa, lura è quai en maun da Dieu l'istorgia che resta: Il whistleblower è vegnì schicanà pervi da ses whistleblowing. Ma constat quell'istorgia en sia simplicità?

En sazez vai gea per duas istorgias separadas. L'emprima va uschia, en versiu ferm resumada: Las firmas da construcziun en Engiadina e Val Müstair èn sa cunvegnydas sur onns en sesidas mez clandestinas davart lavurs e pretschs. Quai era atgnamain usus en l'entira branscha da construcziun svizra, enfin che la le-



«L'istorgia è raquintada – u perfin betunada.»

FOTO CCO

scha da cartel è vegnida revedida dal 1995 e lura anc ina giada sur-lavurada dal 2003. Il pli tard a partir da quel mument eran las praticas en la branscha da construcziun illegalas. Ma ils impressaris ladins han cuntinuà cun las cunvegnyas – per naività, per engurdia, per spira nonchalance impertinente u per preoccupaziun da mantegnair plazzas da lavur en la regiun periferica. Tgi sa? Insumma, in dals cartellists ha bandunà il 2006 la maisa radunda ed ha denunzià l'embruagl: Adam Quadroni. Ed el ha uschia mess en moviment tut las inquisiziuns. Oz savain nus – suentar divers rapports d'inquisiziun – che las autoritads communalas e chantunalas n'han betg prendì serius las denunziadas dad Adam Quadroni ed han perquai (per part) tralascià lur incumbensa da surveglianza e d'uffizi. In scandal. Gist era perquai ch'il chantun e las vischnancas èn sezzas stadas unfrendas da pretschs memia aut tar projects dal maun public.

Senza dubi: Igl è in merit dad Adam Quadroni dad avair fatg il pass necessari per svelar tut.

Ma dasperas datti anc in'otra istorgia. L'istorgia persunala dad Adam Quadroni. Igl è ina sort «guerra da las rosas» cun sia dunna. E cun quai ch'i va per dispitas persunalas dad ina letg ch'è ida a ballins, sco bleras autras era, restan ils detagls in pau zuppads. La dispita è davant dretgira – ed igl è grev schon mo da tegnair la survista dals puncts da dispita enconuscents a la publicità. I va per il dretg da visita per ils uffants, i va per l'inculpaziun da violenza, i va per decisziuns giustifitgadas u arbitraras da las autoritads etc.

Tranter auter vai era per in'arrestaziun problematica e violenta dad Adam Quadroni l'onn 2017, nua ch'ìns ha manà el en psichiatria.

Sco l'emprima inquisiziun da la PUK ha constatà, è quell'arrestaziun stada mal documentada, per part nungiujustifitgada e sur misura. Ditg curt: Igl è vegnì fatg entiert ad Adam Quadroni. Tgi ch'è propi la culpa ed en tge dimensiun, quai vegn tractà en tribunals.

**«Vi da quest'istorgia sa mussa in dals fenomens da l'umanità, che po tuttavia era esser fitg bel: istorgias restan! Il sulet problem: i restan halt en testa er las istorgias raquintadas memia simpel.»**

Ma ussa vegnì cumplitgà! I va numnadamain per la colliaziun da las duas istorgias, colliada tras la persuna dad Adam Quadroni. Dad ina vart l'istorgia dal cartel – e da l'otra vart quella da la «guerra da las rosas».

Il problem delicat è che quell'as duas istorgias èn vegnydas fusiunadas medialmain quests davos trais onns. En la gronda seria d'artitgels da la «Republik» da la fin

avrigl 2018 aveva la redacziun propi enchastrà ina istorgia en l'otra e cun quai costruì «logicamain» la lingia causala. E quella va apunta uschia: Adam Quadroni ha tradì il cartel ed è perquai vegnì torpedà e maltractà da las instanzas en connex cun sias dispitas en la letg. Quai tuna logic, u betg? En mintga cas han autras medias – tranter auter era in film documentar dad SRF – chantà pli u main la medema chanzun.

Ma sch'ìl connex causal è propi stà uschè cler, lura vulesse quai dir che tant il derschader regiunal, il medi, ils policists ed auters uffizians fissan tuts mo stads (en il cas da la dispita da las rosas) marionettas da la pussanta branscha da construcziun. Diversas medias han era anc etablì colliaziuns directas tranter in cas e l'auter, saja sur partenaris/as u parentella ubain sur autras plaschentinhas, sco per exempel regals en furma da «Früchtekorbs».

Sche la lingia causala è propi stada uschè simpla, lura povra Engiadina! Lura fissan tuts sut la medema cuverta, tuts fissan sut curatella da la branscha da construcziun, tuts encunter in, tuts encunter Quadroni.

Il problem: Quai è in'istorgia e colliaziun detg simpla – per betg dir «saimpla». Ch'i dat, surtut en valladas pli pitschnas, squitschs socials, loialitads e colliaziuns persunalas tranter persunas da bransch privatas ed autoritads publicas, quai è enconuscent. Ma probabel na sa lascha quai betg evitar enfin al mument che tut l'administraziun publica vegn centralisada a Cuira, a Berna u sin in auter planet. Però la colliaziun apparentamain evidenta insinuescha che las autoritads (engiadinaisas) hajan funcziunà quasi mo sin giavisch dals pussants e funcziunian sco chauns da polizia mo sin cumond dals patruns, senza far sez dus-trais patratgs davart l'agen agir, senza far ed avair agens rasters da valitaziun ed agens proceders da decisziun – ils quals pon sa chapescha era manar a decisziuns ed acziuns sbagliadas (vide il cas Quadroni).

E tge din las inquisiziuns fatgas per incumbensa dal chantun? Tuttas vegnan (silmain enfin ussa) a la conclusiun ch'i na dettia naginas cumprovas per ina colliaziun directa da las duas istorgias. Per exempel scriva la PUK en il recent segund rapport da bunamain 400 paginas: «Schliesslich konnte die (...) medial verbreitete Hypothese, wonach (...) eine Instrumentalisierung der Kantonspolizei und anderer Stellen stattgefunden habe, nicht bestätigt werden.» Ed er l'emprim rapport da la PUK, publicat il november 2019, resume-

scha: «Die PUK konnte trotz aufwändiger Untersuchung im Rahmen des vorliegenden Teilberichts keine Instrumentalisierung der Kantonspolizei und weiterer involvierten Stellen durch Mitarbeitende von Unternehmen feststellen, die (mutmasslich) dem Baukartell im Unterengadin angehört.»

Tgi ha ussa raschun? Datti ina colliaziun dad in'istorgia a l'otra? Datti la clera «lingia causala»? U cun auters peds: Quadra l'istorgia sur da Quadroni uschè bain? Èsi propi uschia che ses destin persunal è enchastrà cumpletamain cun quel dal whistleblowing? Bain cler, din bles! Tgi che metta en dumonda quella causalità directa, vegn svelat confruntà cun la reproscha da betg esser interessà dad insumma vulair svelar il cas, dad esser naiv, da betg prender serius il destin dad Adam Quadroni, da forza perfin metter en dumonda l'existenza da las praticas da cartel. Po dar ch'i dat anc inquisiziuns penales u retschertgas schurnalisticas che vegnan la finala da cumprovar la correlaziun apparentamain evidenta. Però al mument resta quai intschert. Igl è ina supposiziun. E supposiziuns pon bain esser correctas – ma er sbagliadas. Er la rapportaziun mediala avess da tegnair quint da talas intschertezas e dal caracter da supposiziun.

Per dir anc ina giada en net e stget rumantsch: Las praticas da cartel e l'ignoranza dals funcziunaris èn in scandal. Il tractament dad Adam Quadroni tras singuls uffizians n'è betg stà correct. Ed igl è senza dubi in merit dad Adam Quadroni dad avair svelà il cas da cartel. Igl è er senza dubi in merit dal magazin online «Republik» e dad autras medias dad avair retschertgà e publicatg l'entir cas ed uschia avair dà il stausch per inquisiziuns penales ed uffizialas.

Ma l'istorgia lascha enavos bleras victimas. Ella lascha surtut enavos memia bleras victimas – surtut perquai che la colliaziun da duas istorgias ch'eran en sazez differentas, ha mess en dumonda l'integritad da bleras persunas, da bler dapli persunas che quell'as ch'han truschà la pasta.

Però ussa è l'istorgia raquintada. E vi da quest'istorgia sa mussa in dals fenomens da l'umanità, che po tuttavia era esser fitg bel: istorgias restan! Il sulet problem: i restan halt en testa er las istorgias raquintadas memia simpel. Istorgias pli cumplitgadas e munidas cun dapli dubis han per cunter pli grev da sa metter tras. Perquai ch'i na quadran betg adina uschè bainin.